

**Uunga siunnersuut: Suliffeqarnermi innersuussisarneq il.il. pillugit Inatsisartut inatsisaata nr. 5, 8. juni 2014-imeersup allannguuteqartinnissaa pillugu Inatsisartut inatsisaat nr. xx, yy 2015-imeersoq**

(Suliffinnut nittartakkap atorneqarnera)

(Inuussutissarsiornermut, Suliffeqarnermut, Niuernermit Nunanullu Allanut Tunngasunut Naalakkersuisoq)

**Akissutitut allakkiaq**

(Inuussutissarsiornermut, Suliffeqarnermut, Niuernermit Nunanullu Allanut Tunngasunut Naalakkersuisoq)

**Aappassaanneerera**

Suliffeqarnermi innersuussisarnermut inatsisip allanngortinnissaa pillugu Inatsisartut inatsisaannut siunnersuutip aappassaannik oqaluuserinera sioqqullugu siunnersuummut tapersersuineq Naalakkersuisut sinnerlugit qujassutigissavara.

Aamma Inuussutissarsiornermut Ataatsimiititaliap isumaliutissuussutaa qujassutigaa, ataatsimiititaliami amerlanerussutillit siunnersuutip akuersissutiginnissaanut innersuussimmata.

Nunami namminermit suliffeqarfimmi suliffissanut nittartagaq nunami namminermit pitsaanerusumik ataqatigiissitseqataassasoq, aammattaaq sulisartut nunanit allaneersut sulisorinerannik suliffissanut nittartagaq annikillisaaqataasinnaassasoq, sulisartunullu nunatsinneersunut suliffiit inuttaligassat nunami namminermit saqqummiunneqartarnissaannik qularnaarisassasoq ataatsimiititaliami amerlanerussutillit neriuutigaat.

Ataatsimiititaliami ikinnerussutillit siunnersuutip itigartitsissutigisassatut innersuutigigaat aamma maluginiarneqarpoq. Suliffissarsinissamut tulluarsaqatigiissani immikkoortiterisarnerup aporfussannginnerata qanoq qulakkeerneqarsinnaanera ikinnerussutillit akissuteqarfiunissaa kissaatigaat. Taamatuttaaq kommunit suliffissaaleqisullu CV-liorlutik tassannga suliffissanut nittartakkamut inissinnissaata qanoq qulakkeerniarneqarnissaa ikinnerussutillit akissuteqarfiunissaa kissaatigaat, ullut tamaasa internetimik ajornartorsiutit kommuninilu ulapaarnerujussaq pillugit nalunaaruteqartoqartarmat.

Kommunini suliffissarsiuussisarfiit aamma Namminersorlutik Oqartussat suliffissaaleqisut kikkut qanorlu amerlatigisut sulinissamut piareersimanerinek erseqqissumik takussutissaqartinniarlugit tulluarsaqatigiisseriaaseq eqqunneqarpoq. Kiisalu suliffissaaleqisut iliuuseqarfiginnissaanut piareersinniarlugit imaluunniit suliffeqaleqqinnissamut piareersinniarlugit qanoq amerlatigineranut tamanik takussutissaqarfimmik pilersitsisoqarsinnaassammat.

Taamatullu tulluarsaqatigiisseriaaseq suliffissaaleqisunut suliffinnullu iluaqutissatut eqqunneqarpoq. Inuit tulluarsaqatigiissat 1-miittut sulinissamut piareersimasutut nalilersorneqarput. Tulluarsaqatigiissat 2-miittut suliffeqarfimmut uteqqissinnaalersillugit ikiorserneqarlutillu pikkorissartinneqarsinnaapput. Tulluarsaqatigiissat 3-miittut annertunerusumik ikiorserneqarnermik ilitserorneqarnermillu neqeroorfigineqarsinnaapput.

Tulluarsaqatigiissani sorlarni suliffissaaleqisoq nalunaarsugaagaluartoq suliffissaaleqisup nammineq suliffissarsiornissaanut imaluunniit assersuutigalugu ilinniagaqarniarnissaanut sunik aporfissaqartoqanngilaq. Tulluarsaqatigiisseriaasertaaq suliffissanut nittartakkami CV-mik pilersitsinissaanut tulluarsaqatigiissat 3-miittumut killeqartitsinngilaq.

Suliffissaaleqisut ilaasa suliatigut aamma suliarisaanngitsutigut piginnaasaat pillugit qarasaasiakkut toqqorsivimmi IT-reg.-imi ullumikkut paasissutissanik nalunaarsuisoqareerpoq. Paasissutissat taakku Suliffinnut nittartakkamut nuunneqarumaarput, taamaalillutik suliffissaaleqisut ilarujussui CV-liortoqassatillugu soqanngitsumit aallartinnisaaq pisariaqassanani.

Suliffissarsiuussisarfinni sulisuusunut suliassat amernissaat taamaalilluni naatsorsuutigineqanngilaq, paarlattuanilli saqqummiussaqaarfiup kingornatigut piffissamik sipaaruteqarneq anguneqarsinnaassaaq, aammalu nunami suliffeqarfinni sulisuusut najugaqavissut amerleriarnissaat anguneqassalluni.

Taamatut oqaaseqarlunga Naalakkersuisut sinnerlugit siunnersuutip akuersissutiginnissaa innersuutigissavara.